

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaat pillugu Namminersorlutik Oqartussat nalunaarutaat

Matumuuna qimmit qimuttut kiisalu qimmeqarneq qitsuuteqarnerlu pillugit inatsisartut inatsisaat nr. 18 30. oktober 1998-meersup allannguutai Inatsisartut inatsisaat nr. 28 18. november 2010-meersaq, Inatsisartut inatsisaat nr. 23 22. november 2011-meersaq kiisalu Inatsisartut inatsisaat nr. 24 28. november 2016-meersaq matumuuna nalunaarutigineqarpoq.

Kapitali 1

Siunertaa atuuffissaalu il.il.

§ 1. Kalaallit Nunaanni qimmit qitsuillu peqqissuunissaasa qulakkeernissaat inatsimmi siunertarineqarput, kalaallit qimmiata qimuttup qimminit allanit akuneqatsaaliorlugu illersorneqarnera kiisalu inuit, uumasut avatangiisillu qimminit qitsunnillu ajoquserneqannginnissaannik illersuinissaq siunertarineqarluni.

§ 2. Inatsimmi qimmit qitsuillu inuussutissarsiutigalugu inuussutissarsiutiginaguluunniit uumasuutigineqartut tamarmik pineqarput.

§ 3 Qimuttunik qimmeqarfiit inatsimmi uani ima paasineqassapput Kalaallit Nunaata kitaani avannarpasissutsip 66-p avannaaniittoq, Kalaallit Nunaata Avannaa aamma Tunumi tamarmi Nunap Isuata Kangiani, kippasissutsip 44-iata kangianiittoq.

Kapitali 2

Oqartussat

§ 4. Piumasaqaatit §§-ni 8, 12, § 21 imm. 8, aamma §§-ini 22 23-milu aalajangersarneqartut taakkuluunniit naapertorlugit malittarisassat aalajangersarneqartut malinneqarnissaat qulakkeerniarlugit peqqussutitut inerteqqutitullu pisariaqartinneqartut isigisat Naalakkersut nalunaarutigaat.

Imm. 2 Naalakkersuisut pisinnaatitaaffitik tamaasa taakkualuunniit ilaat kommunalbestyrelsimut isumagisassanngortissinnaavaat.

§ 5. Piumasaqaatit §§-it 7, 9, 10, 13, imm. 1, §§-it 15, 16,19, § 21, imm. 1-3-mi aalajangersarneqartut taakkuluunniit naapertorlugit malittarisassat aalajangersarneqartut malinneqarnissaat qulakkeerniarlugit

peqqussutit inerteqqutillu pisarialittut isigineqartut kommunalbestyrelsip nalunaarutigissavai.

§ 6. §§-it 4 aamma 5 naapertorlugit nakkutilliisutut oqartussat inuillu immikkut taamatut pisinnaatitaasut kinaassutsiminnik uppernarsaateqarlutik eqqartuussivimmillu pisinnaatitsissuteqaratik qaqugukkulluuniit pisortat namminersortullu illuutaannik, iniutaannik, angallataannik allagaataataannillu takusaasinnaapput paasissutissanik inatsit inatsimmiluuniit malittarisassat aalajangersarneqartut naapertorlugit aalajangiinissamut atugassanik pissarsiniarlutik.

Imm. 2 Pisariaqartillugu politiit ikiuussinnaapput. Naalakkersuisut inatsisunik atuutitsinermut ministerimik isumaqatiginninniareerlutik taakkua pillugit itinerusunik malittarisassiorsinnaapput.

Kapitali 3

Qimmeqarneq qitsuuteqarnerlu

§ 7. Sumiiffiit avatangiisinut peqqinnangitsut imaluunniit uumasuutininik uumasuusivigissallugit naleqqutinngitsutut isigineqartut qimmeqarfiginissaat qitsuuteqarfiginissaallu taakkunanngalu ataatsimoortitsiviginissaat inerteqqutaapput.

Imm. 2. Sumiiffiit qimmit qitsuillu ataatsimoorfigisinnaasaat pillugit maleruagassanik Naalakkersuisut aalajangersaavigisinnaavaat.

§ 8. Naalakkersuisut aatsaat akuersiseqqaarlugit qimmit inaannik, qimmit qitsuillu inissiiviinik, napparsimmaviinik, qimmit qitsuillu inuttaqanngitsut angerlarsimaffinik assigisaannillu ilusilersuisoqaqqusaavoq ingerlatsisoqaqqusaallunilu.

Imm. 2. Naalakkersuisut akuersissutit atugassarititaat pillugit malittarisassanik aalajangersaasinnaapput.

§ 9. Qimmit arfinilinnik qaammateqalereersimasut kalunnernik pitussimassapput, isersimatinneqarlutik, ungaluniillutik imaluunniit pituuttami isassimasumi pituuttarineqassallutik.

Imm. 2. Imm. 1-imi aalajangersakkanut ilaatinneqanngillat savaatillit qimmii, sulinerlutik atatillugit qimmit naalakkersugaasut, qimmit illoqarfiup avataani aallaaniarnermut suliffulluunniit avataatigut sammisaqarnernut atatillugu atorneqartut aamma naalakkersugaasut kiisalu qimmit qeqertani qimmilivittut akuerisaniittut.

Imm. 3. Qimmit pituussaaqqasut, allanut navianartorsiortitsisut, piginnittumut taarsiinnissamik akisussaaffittaqaqngitsumik toqunneqarsinnaapput. Tamannali imm. 2 naapertorlugu qimminut pituussaaqqasunut akuerisanut atuutinngilaq.

§ 10. Kiisortunik qimmeqarnissaq inerteqqutaavoq.

Imm. 2. Qimmit inunnik uumasunilluunniit allanik upannillutik kiiserujussuarsimasut politiit peqqusineratigut erngertumik toqunneqartassapput piginnittumit akilerneqartussamik.

Imm. 3. Qimminik paannitsitsisarneq inerteqqutaavoq.

Imm. 4. Namminerisamik qimmeqarnissamut pisinnaatitaaffik eqqartuussinikkut naassaangitsumik imaluunniit piffissami aalajangersimasumi arsaarinnissutigineqarsinnaavoq, pineqartoq

1) qimmimik saassutsitsisimappat imaluunniit inummut uumasumulluunniit siorasaarutitut qimmeq atorsimappagu,

- 2) qimmip inuit uumasulluunniit saassukkai piginnittup malugereerlugu qimmini noqissimangippagu imaluunniit
- 3) qimminik paannitsitsisimappat.

§ 11. Qimmiutilik qimmiutimi ajoqusigai pillugit taarsiisussaataivoq.

Imm. 2. Qimmit pillugit akisussaanermut sillimmasiisarneq pillugu Naalackersuisut malittarisassiorsinnaapput.

§ 12. Kalaallit Nunaanni imaluunniit sumiiffinni aalajangersimasuni qimminik naggueqatigiinnik aalajangersimasunik aamma qimminik navianartorsiortitsisinnaasunik, ersiortitsisinnaasunik imaluunniit illersorneqarsinnaasumik paarilluarneqarsinnaanngitsunik uumasuuteqaqqusaannginneq pillugu Naalackersuisut malittarisassanik aalajangersaasinnaapput.

Imm. 2. Qimminik makkuninnga qimmeqarneq, eqqussineq piaqqiortitsinerlu inerteqqutaavoq:

- 1) Pitbull terrier.
- 2) Tosa inu.
- 3) Amerikamiut staffordshire terrieriat.
- 4) Fila brasileiro.
- 5) Dogo argentino.
- 6) Amerikamiut bulldogiat.
- 7) Boerboel.
- 8) Kangal.
- 9) Aasiap qiterpasissuanit ovtcharka.
- 10) Kaukasiamit ovtcharka.
- 11) Ruslandip kujataanit ovtcharka.
- 12) Tornjak.
- 13) Sarplaninac.

Imm. 3. Imm. 2-mi inerteqqut qimminut qimminut qulaani taaneqartunit akuneqarsimasunut aamma atuuppoq.

§ 12 a. Qimmit § 12, imm. 2 unioqqutillugu pigineqartut, eqqunneqartut imaluunniit piaqqiortinneqartut qimmimik piginnittumut taarsiisuteqarfiunngitsumik piginnittumiillu akilerneqartussamik politiit iliuseqarneratigut toqunneqartassapput.

Imm. 2. Qimmeq qimminut § 12, imm. 2-mut ilaanersoq imaluunniit taakkuninnga akusaanersoq nalornissutigineqarpat qimmip qimmeqatigiinnit sorlerneersuuneranik suuneranilluunniit piginnittup uppernarsaanissaa politiit piumasarisinnaavaat.

Imm. 3. Piginnittoq imm. 2 naapertorlugu erngerluni naammattumik uppernarsaammik saqqummiussisinnaassanngippat, qimmip piginnittumit arsaarinnissutigigallarnissaa siunertaralugu politiit iliuseqarnissamik aalajangiissapput.

Imm. 4. Arsaarinnissuteqarallanermut atatillugu aningaasartuutit piginnittumit akilerneqassapput.

Imm. 5. Politiit uppernarsaanissamik piumasaqarsimatillugit tigungminnittoq piginnittorlu assigiinngikkaangata qimmip qimminut § 12, imm. 2-mut ilaatinneqartunut ilaannginneranik imaluunniit

taakkuninnga akusaannginneranik piginnittup naammattumik uppersaasiinissaanut pisut apequtaatillugit naapertuuttumik politiit piffissaaliissapput.

Imm. 6 Piginnittoq politiit piffissaliussaata iluani qimmip qimminut § 12, imm. 2-mut ilaatinneqartunut ilaanginneranik imaluunniit taakkuninnga akusaannginneranik naammattumik uppersaasiinnaasimanngippat qimmeq §12, imm. 2-mi inerteqqummut ilaasutut isigineqassaaq.

§ 12 b. Inuit 1. januar 2012-mi qimminik § 12, imm. 2-mi taaneqartunik imaluunniit taakkuninnga akusanik qimmeqartut qimmiutitik tigummiinnarsinnaavaat.

Piumasaqaatit makkua eqquutsinneqassapput:

- 1) Qimmit pineqartut allanut tunniunneqassanngillat.
- 2) Qimmit 2 meterinik takinerpaamik pituutaqartinneqassapput aamma tamanit tikinneqarsinnaasuniitsillutik ersaquteqartinneqartassapput.

Kapitali 4

Qimmit qitsuillu pillugit ileqqoreqqusat

§ 13. Kommunalbestyrelsi qimminut qitsunnullu kommunimi ileqqoreqqusanik suliaqassaaq.

Imm 2. Ileqqoreqqusat imm. 1-mi taaneqartut imarisaat pillugit Naalakkersuisut erseqqinnerusunik malittarisassanik aalajangersaassapput.

Imm 3. Imm. 1-imi ileqqoreqqusat taaneqartut atuutilersinneqartinnagit Naalakkersuisunit akuerineqaaqassapput.

Kapitali 5

Qimmit qitsuillu katsorsarneqartarneri

§ 14. Qimmit qitsuillu illersorneqarsinnaasumik katsorsarneqartassapput aamma anniaatinut, naalliuutinut, annilaanganermut, inuunermik sinnerani ajoqutinut malunnaatilimmillu ajoqutinut sapinngisamik pitsaanerpaamik illersorneqassallutik.

§ 15. Kinaluunniit qimmiuteqarlunilu qitsuuteqartoq taakkunanga qajassuartumik isumassorneqarnissaannik isumaginnissaaq, matumani nerisitsineq, imertitsineq aamma timimikkut, pissusilersornermikkut peqqissuunissaminnik pisariaqartitaat eqqarsaatigalugit suleriutsit akuerineqarsimasut aamma ilisimatuussutsikkut misilittakkat naapertorlugit paarsisassapput.

Imm 2. Qimmit qitsuillu panertumik nallavissaqarnissaminnut periarfissaqartinneqassapput.

Imm 3. Kinaluunniit qimmeqarlunilu qitsuuteqartup taakkua ullormut ikinnerpaamik ataasiarlutik takusarneqartarnissaat isumagissavai.

Imm. 4. Qitsuit qitsuit inaanni anisissanagit mattusimaneqartuaannassanngillat.

Imm 5. Meeqqat 16-it inorlugit ukiullit uumasuuteqaqqusaapput angajoqqaatik imaluunniit paarsisutik nakkutilliisoralugit akisussaasoralugillu.

§ 16. Qimmit uumatillugit piniariartarfinnut aallaaniartarfinnulluunniit imaluunniit qimussimik angalanerni sukkaniunnerniluunniit qimaannarneqarnissaat inerteqqutaapput.

Imm. 2. Nuunnermi aallaqqanermiluunniit qimmit qitsuillu uumatillugit naammattumik nakkutilliisoqartinnagit qimannissaat inerteqqaapput.

§ 17. Qimmimik qitsummilluunniit toqutsiniartup sapinngisamik sukkasuumik anniartitsinertaqanngitsumik uumasup toqunneqarnissaa qulakkiissavaa.

Imm. 2. Imermut/imaanut ipititsilluni, qimitsilluni imaluunniit nivinngaalluni toqutsinerit inerteqqaapput.

Imm. 3. Naalackersuisut qimminik qitsunnillu toqutsisarnerit pillugit malittarisassiorsinnaapput.

§ 18. Qimminik imaluunniit qitsunnik anniartunik pilaanissaq pinngitsoorneqarsinnaatinnagu pilaanissaq uumasut nakorsaannit taamaallaat suliarineqarsinnaavoq, sivikitsumik annikitsumik anniartinnissaat minillugu, pilaanissap kinguartinneqarsinnaanera utaqqissunneqarsinnaangippat.

Imm. 2. Uumasuutip isikkuata allanngortinnissaanik siunertaqarluni pilattaasoqassanngilaq assigisaanilluunniit iliuuseqartoqassanani.

Imm. 3. Pamiut siutilluunniit nuuinik kipisineq inerteqqaavaoq, nappaatit peqqutigalugit uumasut nakorsaata suliarisimangippagit.

Imm. 4. Atortulersorluni allatulluunniit iliorluni qimmit kigutaannik ajoqusiinissaq inerteqqaavaoq.

Imm. 5. Qitsuit kukiinik pilattaanikkut allatulluunniit iliorluni peersinissaq inerteqqaavaoq.

Kapitali 6

Kalaallit qimmianik qimuttumik akuneqatsaaliulluni illersuineq

§ 19. Qimuttoqarfuit kalaallit qimmiinik qimmeqarfiupput.

Imm. 2. Qimminik qimuttoqarfinnut qimminik eqqussinissaq inerteqqaavaoq.

Imm. 3. Imm. 2-mi aalajangersakkat apeqquataatinnagit qimmit sulinermut atatillugu qimmerineqartut qimmillu innarluutillit ikiortaata qinnuteqarnerup kingorna Naalackersuisut akuersisinnaapput taakkualu pillugit piumasaqaatit aalajangersarsinnaallugit, matumani qimmit taamaattut kinguaassiorsinnaajunnaarnissaannik piumasaqaatit ilanngullugit.

Imm. 4. Qimmit qimuttut, qimminik qimuttoqarfinnit anninneqarsimasut Naalackersuisut immikkut akuersinerisigut taamaallaat eqquteqqinneqarsinnaapput.

Imm. 5. Sumiiffinnut allanut kalaallit qimmiinik qimuttunik eqqussineq inerteqqaavaoq.

§ 20. Naalackersuisut immikkut akuersinerisigut taamaallaat kalaallit qimmiisa anisuuinik manniinillu nuussisoqaqusaavoq.

Kapitali 7

Nakkutilliineq, nalunaaqutsersuineq akiuussusersuinerillu

§ 21. Qimmimik, matumani qimminik qimuttunik savallu qimmiinik tigumminnittup qimmeq ima isumagisassavai:

1) Naalackersuisut akiuussusersuinissamik pilersaarutitut aalajangersagaasa ilaat malissavaa, qimmit nappaataannut parvovirusimullu akuttunngitsumik akiuussuserneqartarlutik, aamma

2) qimmit ataasiakkaarlutik inuunermi sinnerani atuuttussamik, siullermeerlutik akiuussusertinnginnerminni imaluunniit akiuussutissamik kapitinnermik nalaanni, nalunaaqutsersorneqassasut nalunaarsorneqarlutillu.

Imm. 2. Qimmeq inuunermi ukiumi siullermi pingasoriarluni akiuussutissanik kapineqassaaq aamma tamatuma kingorna ukiut pingasukkaarlugit akiuussutissanik kapeqqinneqartassalluni.

Imm. 3. Imm. 1 malillugu akiuussutissamik kapuinerit nalunaaqutsersuinerilluunniit uumasut nakorsaattut ilinniarnikumit imaluunniit qimminut akiuussutissanik kapuisinnaatitaasumit taamaallaat suliarineqarsinnaapput.

Imm. 4. Kommunalbestyrelsip kommunimi qimminut akiuussutissanik kapuisinnaasutut allagartallit uumasulluunniit nakorsaata pisariaqartitat naapertorlugit atorfillit amerlassusaat nakkutigissavai.

Imm. 5. Kommunalbestyrelsip inassuteqarnera naapertorlugu Naalakkersuisut kommunini qimminik akiuussutissiisartutut sulisussat ilinniartillugillu allagartalersussavaat.

Imm. 6. Qimmit kommunimi akiuussutissannik kaporneqartut, nalunaaqutserneqartut nalunaarsorneqartullu pillugit nalunaarutiginninnerit Naalakkersuisut piumasaqarneratigut kommunalbestyrelsip nassiuttassavai.

Imm. 7. Qimmit nakkutigineqarneri Naalakkersuisut aallartissinnaavaat, matumani qimmit qimuttut savallu qimmii aamma qitsuit ilanngullugit. Naalakkersuisut nakkutiginninneri misissugassanik tigooqqaallutillu katersisinnaapput kiisalu immikkut nalunaaqutsersuillutik nalunaarsuillutillu.

Imm. 8. Qimminik tigungminnittoq, matumani qimminik qimuttunik savallu qimmiinik aamma qitsunnik tigungminnitut ilanngullugit, Naalakkersuisunut imaluunniit kommunalbestyrelsimut pisuni imm. 7-mi allaaserineqartutut ittuni pisariaqartitsineq naapertorlugu aningaasarsiaqaatiginagu ikiuutissaaq/-ssapput.

Imm. 9. Imm. 6 naapertorlugu nalunaarutiginninnerit pillugit Naalakkersuisut sukumiinerusunik malittarisassiorsinnaapput, matumani kommunalbestyrelsip paasissutissat suut nalunaarutigissaneraat, paasissutissat qanoq nalunaarutigineqartassanersut kiisalu nalunaarutiginninnerit qanoq akulikitsigissanersut ilanngullugit.

§ 21 a. Qimminik tigungminnittoq, matumanilu qimminik qimuttunik savallu qimmiinik tigungminnittoq, qimmit ataasiakkaat immikkut akiuussutissanik kaporneqarnissaannik, imaluunniit nalunaaqutserneqarnissaannik aamma nalunaarsorneqarnissaannik peqqussummut akерliusoq kommunalbestyrelsip peqqusineratigut qimmeq pinngitsaalillugu akiuussutissaanik kaporneqassaaq, nalunaaqutsersorneqarluni kiisalu nalunaarsorneqassalluni.

Imm. 2. Imm.1 naapertorlugu qimmit pinngitsaaliissummik akiuussutissanik kaporneqarsinnaangippata, nalunaaqutsersorneqarsinnaangippata kiisalu nalunaarsorneqarsinnaangippata kommunalbestyrelsip suliniutigissavaa tigungminnitup akiligaanik tigungminnitumullu taarsiinertaqanngitsumik qimmit toqunneqarnissaat.

§ 21 b. Qimmit nappaataannik parvovirusimillu annerusumik tuniluuttoqarluni nappaalasoqarnerani Naalakkersuisut innersuussinerisigut akuersinerisigullu akiuussusersuineq taamaallaat annertusineqarsinnaavoq.

§ 21 c. Qimmit qimuttut savallu qimmiisa qimmit nappaataannut parvovirusimullu akiuussutissamik kaporneqarnerinut kiisalu nalunaaqutsersortinnerinut aningaasartuutit Nunatta karsiata akilertassavai.

Imm. 2. § 21-imi aalajangersakkat saniatigut akiuussusersuinermit nalunaaqutsersuinerimullu aningaasartuutit kiisalu uumasunik allanik imm. 1-mi allassimanngitsunik akiuussusersuinerit nalunaaqutsersuinerillu tigumminnittumit akilerneqartassapput.

Kapitali 8

Qimminik qitsunnillu niuerneq il.il.

§ 22. Inuit, ingerlatseqatigiiffit, peqatigiiffit il.il. inuussutissarsiutigalugu inuussutissarsiutiginalu qimmeerniartut qitsuerniartullu tuniniaanerminnik oqartussaasunut nalunaarutiginnittarnissaannik aamma pisiainnik tunisaminnillu nalunaarutiginnittarnissaat pillugit Naalakkersuisut malittarisassiorsinnaapput.

§ 23. Qimmit qitsuillu angallaneqarneri pillugit Naalakkersuisut malittarisassiuussisinnaapput, matumani ingiaqataasut uppersaasorsorneqartarnissaannik piunasaqaatit ilanngullugit.

Kapitali 9

Nakkutilliineq aamma uparuaaneq

§ 24. Kinaluuniit qimmip qitsulluuniit § 14 naapertorlugu illersorneqarsinnaanngitsumik pinnittoqarneranik pasitsaassisoq tamanna pillugu uumasut nakorsaannut imaluuniit politiiinut imaluuniit kommunefogedimut erngertumik nalunaarutiginnissaaq.

Imm. 2. Uumasut nakorsaat, politiit imaluuniit kommunefogedi nalunaarut pillugu Naalakkersuisunut erngerluni nalunaarutiginnissaaq.

Imm. 3. Avatangiisinut Pinngortitamullu Pisortaqrarfiup Uumasut nakorsaqarfia politiit imaluuniit kommunefogedi illersorneqarsinnaanngitsumik pinnittoqarsorinnineq pillugu nalunaaruteqassaaq.

§ 25. Qimmit qitsuilluuniit illersorneqarsinnaanngitsumik pineqartillugit uumasup pineqarnera pillugu akisussaasoq politimesterimit peqqussuteqarsinnaavoq.

Imm. 2. Uumasooq napparsimappat imaluuniit aqqinneqarsinnaanngitsumik ajoqusersimappat politimesteri uumasup pisariaqanngitsumik naalliutsinneqarnera pinngitsoorniarlugu toqutseqqusisinnaavoq.

Imm. 3. Peqqussut allaganngorlugu nalunaarutigineqassaaq. Peqqusissutip nalunaarutiginninnerani politimesteri Naalakkersuisunit uppersaammik piniassaaq. Aamma uumasumut akisussaasoq oqaaseqaateqarnissaminik periarfissinneqassaaq.

Imm. 4. Uumasup naalliorujussuarnera pinngitsoortinniarlugu imaluuniit akisussaasoq aallarsimassagatinneqarpat imm. 3 avaqqunneqarsinnaavoq.

Imm. 5. Imm. 2 naapertorlugu toqutsineq uumasup piginnittaanut taarsiinertaqanngitsumik pissaq.

§ 26. § 25, imm. 1 naapertorlugu peqqussut malinneqanngippat uumasooq politimesterimit toqutsinneqarsinnaavoq piginnittaanut taarsiinertaqanngitsumik.

§ 27. § 25 imm. 1 naapertorlugu peqquneqartup aamma § 26 naapertorlugu uumasumik toqutsisoqarsimatillugu, piginnittup suliaq eqqartuussivimmuq suliaqanngortissinnaavaa. Aalajangiinerup pineqartumut nalunaarutigineqarneranit ullut 14-it qaangiutsinnagit tamanna pillugu qinnuteqaat politimesterimut saqqummiunneqassaaq. Eqqartuussivimmuq tunniussineq suliamik unitsitsinerunngilaq.

Kapitali 10

Pineqaatissiisarneq pillugu aalajangersakkat

§ 28. § 7, imm. 1-imi, § 8, imm. 1-imi, § 9, imm. 1-2-mi, § 10, imm. 1-3-mi, § 12, imm. 2-3-mi, § 12 b-imi, §§-ini 14-18-imi, § 19, imm. 1-imi, 2-mi, 4-mi imaluunniit 5-imi, § 20-mi aamma § 21-mi, imm. 1, 2, 3-ni imaluunniit imm. 8-mi aalajangersakkanik unioqqutitsinerit akiliisitsinermik kinguneqarsinnaapput.

Imm. 2. § 7, imm. 2-mi, § 8, imm. 2-mi, § 11, imm. 2-mi, § 12-mi, § 13, imm. 1-imi, § 19, imm. 3-mi, kiisalu §§-ini 22-mi aamma 23-mi aalajangersakkanik unioqqutitsinerit akiliisitsinermik kinguneqarsinnaapput.

Imm. 3. § 10, imm. 1-imi aamma 3-mi, § 12, imm. 2-mi aamma 3-mi, § 12 b-mi kiisalu §§-ini 14-18-imi aalajangersakkat sakkortuumik utikattumilluunniit unioqqutitsinerit sunilluunniit uumasuuteqarsinnaanermik imaluunniit uumasuutinik sammisaqarsinnaanermik inerteqqutitut pineqaatissiissutaasinnaapput.

Imm. 4. § 13 imm. 1 naapertorlugu aalajangersakkanik sakkortuumik imaluunniit utikattumik unioqqutitsinerit sunilluunniit uumasuuteqarsinnaanermik imaluunniit uumasuutinik sammisaqarsinnaanermik inerteqqutinngortillugit pineqaatissiissutaasinnaapput.

Imm. 5. Imm. 3 aamma 4 naapertorlugit uumasuuteqarnissamut imaluunniit uumasunik sammisaqarnissamut inerteqqummik pineqaatissiineq qaqumulluunniit atuuttussanngorlugu imaluunniit sivikinnerpaamik ukiumik ataatsimik sivissusilerlugu pisinnaavoq.

Imm. 6. Inatsit una naapertorlugu akiligassiilluni pineqaatissiissutit Nunatta Karsianut nakkartinneqartassapput.

Kapitali 11

Atuutilerfa il.il.

§ 29. Inatsisartut inatsisaat 1. januar 1999 atuutilerpoq Kalaallit Nunaanni qimmit uumasullu illersorneqarneri pillugit Kalaallit Nunaannut inatsimmik Folketingip akuersinissaanik tamanna piumasaqaatitaqarpoq.

Imm. 2. 1. januar 1999-ip kingorna Folketingimit aatsaat akuerineqarpat Inatsisartut inatsisaat ullormi Folketingip akuerinniffiani atuutilissaaq.

Imm. 3. Qimmiuteqarneq pillugu Landsrådit ileqqoreqqusaat 22. juni 1957-imeersoq, landsrådit ileqqoreqqusaatigut 4. marts 1959-imeersoq aqutugalugu allanngortinneqartoq ilutigalugu atorunnaarsinneqassaaq. Taamaattorli §§-ini 6-imi aamma 7-imi tuloriaajaasarneq pillugu aalajangersakkat atuutiinnassapput, Naalakkersuisut inatsimmi uani § 10, imm. 3 naapertorlugu malittarisassanik aalajangersaanissaasa tungaannut.

Imm. 4. Kommunit qimmit pillugit ileqqoreqqusaat kapitali 4 naapertorlugu qimmit qitsuillu pillugit ileqqoreqqusalianit nutaanit taarserneqarnissamik tungaannut atuutiinnassapput, taamaattorli

kingusinnerpaamik 31. december 1999-ip tungaanut atuutissallugit.

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata nr. 28, 18. november 2010-meersup allangortinnissaanut Inatsisartut inatsisaata (Qimuttunik qimmeqarfiit killeqarfilerleri, qimmit tavaannartut taarsiiffiginertaqanngitsumik toqunneqartarnerat, aamma tuloriaajaanermut inerteqqusiineq) atuutilersitsinissamik aalajangersakkat tulliuttut makkua imarai:

§ 2

Inatsisartut inatsisaat ulloq 1. januar 2011-mi atuutilissaaq.

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata allangortinneqarneranik Inatsisartut inatsisaat nr. 23 22. november 2011-meersoq (Qimmit paatinneqartartut nukittuullu eqquteqqusaajunnaarnerat) atuutilersitsinermut aalajangersakkanik makkunanga imaqarpoq:

§ 2

Inatsisartut inatsisaat 1. januar 2012 atuutilerpoq, taamaattorli imm. 2. aamma imm. 3 takukkit.
Imm. 2. § 12, imm. 2-mi qimmit Inatsisartut inatsisaata atuutilernerata kingorna Kalaallit Nunaannut eqqunneqartut imaluunniit piaqqiarineqartut taamaallaat pineqarput.
Imm. 3 Qimmit § 12, imm. 2-mi pineqartut Inatsisartut inatsisaata atuutilernerata kingorna piaqqiorteqqusaanngillat.

Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata allangortinneqarneranik Inatsisartut inatsisaat nr. 24 28. november 2016-meersoq (Inatsisitigut piunasaqaataasumik akiuussutissaliineq, nalunaaqutsersuineq nalunaarsuinerlu pillugit allannguutit) atuutilersitsinermut aalajangersakkanik makkunanga imaqarpoq:

§ 2

Inatsisartut inatsisaat atuutilerpoq ulloq 1. januar 2017, taamaattorli imm. 2. takuuk.
Imm. 2. Qimminik tigumminnittup, matumani qimminik qimuttunik aamma savat qimmiinik, inatsisip atuutilernerani qimmeq ataatsimik ukioqalereersimasooq, inatsisip atuutilerneranit ukioq ataaseq qaangiutsinnagu qimmeq § 21-imi aalajangersakkat naapertorlugit nalunaaqutserlugulu nalunaarsorneqarnissaa isumagissavaa.

Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik, ulloq 23
september 2025

Emanuel Rosing (atsior.)
Naalakkersuisoqarfimmi pisortaq

/ Thomas Rassing (atsior.)

Namminersorlutik Oqartussat
Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut